



Primar / Dotted Pamjen / Prosto Received / Dotted	03 . 08 3	viti god year	
Organ / Njesta Organ / Jedinstvo Org / Unit	Pr. Prof Pr. Prof Prof No	Shtet / a Prilog Appendix	Shera Kolicina Quantity
SKOPJESHK	5507 / 2023		1 / 5



Republika e Kosovës Republika Kosova – Republic of Kosovo

KËSHILLI I PAVARUR MBIKËQYRËS PËR SHËRBIMIN CIVIL TË KOSOVËS
NEZAVISNI NADZORNI ODBOR CIVILNE SLUŽBE KOSOVA
INDEPENDENT OVERSIGHT BOARD FOR THE CIVIL SERVICE OF KOSOVO

A.nr.870/2023

Këshilli i Pavarur Mbikëqyrës për Shërbimin Civil të Kosovës-Kolegji për shqyrtimin dhe vendosjen e ankesave në përbërje nga: Malsore Gashi-Bajraktari-kryetare, Arben Mehmeti dhe Ardita Haxhnikaj-Demi-anëtarë dhe Kaltrina Avdullahi-Prenaj Zyrtare e Lartë për Bashkëpunim Profesional në cilësinë e procesmbajtëses, kanë shqyrtuar ankesën me numër A.nr.870 të datës 20.06.2023, të parashtruar nga ankuesi _____ nga Prizreni, kundër Vendimit me numër Nr.8/2023 të datës 14.06.2023 i Divizionit për Zhvillimin e Rekrutimit dhe Inspektimit i Ministrisë së Punëve të Brendshme në çështjen juridike "kontestim konkursi" duke vepruar në pajtim me nenin 6 paragrafin 1 nën paragrafin 1.1 dhe nenin 18 paragrafin 1 nën paragrafin 1.1 të Ligjit Nr. 06/L-048 për Këshillin e Pavarur Mbikëqyrës për Shërbimin Civil të Kosovës dhe Rregulloren Nr. 02/2018 për Procedurën e Shqyrtimit dhe Vendosjes së Ankesave në Këshillin e Pavarur Mbikëqyrës për Shërbimin Civil të Kosovës, në seancën për këshillim dhe votim të mbajtur më datën 03.08.2023, mori këtë:

V E N D I M

- I. REFUZOHET si e pabazuar ankesa me numër A.nr.870/2023 e datës 20.06.2023 e parashtruar nga ankuesi _____
- II. Mbetet në fuqi Vendimi me numër Nr.8/2023 i datës 14.06.2023 i Divizionit për Zhvillimin e Rekrutimit dhe Inspektimit i Ministrisë së Punëve të Brendshme.

A r s y e t i m

Ministria e Punëve të Brendshme duke u bazuar në Ligjin Nr.06/L-114 për Zyrtarët Publik, nenin 34 paragrafi 2 dhe 3 si dhe nenin 7 dhe 9 të Rregullores (QRK) Nr. 16/2020 për Pranimin dhe Karrierë në Shërbimin Civil të Republikës së Kosovës, fillimisht më datën 06.04.2023 ka njoftuar lidhur me konkursin me numër të referencës Nr.RN00011404, ndërsa më datë 06.04.2023 ka shpallur konkursin e jashtëm për emrin e grupit Specialistë të Përgjithshëm të Shkencave Politike lidhur me pozitën e punës "Zyrtar i Misionit Diplomatik" në Ministrinë e Punëve të Jashtme dhe Diasporës në Zyrën e Sekretarit të Përgjithshëm.

Në bazë të listës së aplikacioneve në këtë konkurs ka aplikuar edhe ankuesi. Në fazën e shqyrtimit paraprak Divizioni për Zhvillimin e Rekrutimit dhe Inspektimit në Departamentin për Menaxhimin e Zyrtarëve Publik, më datë 05.06.2023 ka nxjerr Vendim me numër Nr.33/2023 me të cilin e ka refuzuar aplikacionin me numër Nr.RAN0013681 të ankuesit me arsyetimin se i njëjti nuk ka ofruar dëshmit për njohjen e gjuhës angleze përmes certifikimit

nga një institucion vendor, ndërkombëtar ose studime universitare të kryera në këtë gjuhë ashtu siq është përcaktuar në kriteret e konkursit.

Ankuesi i pa kënaqur me Vendimin me numër Nr.2023 të datës 05.06.2023, më datë 07.06.2023 ka parashtruar ankesë në Departamentin për Menaxhimin e Zyrtarëve Publik, ndërsa më datën 14.06.2023 Divizioni për Zhvillimin e Rekrutimit dhe Inspektimit në Ministrinë e Punëve të Brendshme ka nxjerrë Vendim me numër Nr.8/2023 me të cilin e ka refuzuar ankesën e ankuesit si të pa bazuar me arsyetimin se i njëjti nuk është përfshirë në listën e ngushtë në konkursin me numër të referencës Nr.RN00011404 për grupin Specialistë të Përgjithshëm të Shkencave Politike për pozitën e punës "Zyrtar i Misionit Diplomatik", se me rastin e aplikimit nuk ka ofruar dëshmi të njohjes së gjuhës ANGLEZE në nivelin C1-C2.

Më datë 20.06.2023 ankuesi ka parashtruar ankesë me numër të protokollit 4847/2023 në Këshillin e Pavarur Mbikëqyrës për Shërbimin Civil të Kosovës, kundër Vendimit me numër Nr.8/2023 të datës 14.06.2023 të Divizionit për Zhvillimin e Rekrutimit dhe Inspektimit në Ministrinë e Punëve të Brendshme, me pretendimin ankimor se me asnjë dispozitë ligjore nuk obligohem që dorëzoj dëshmi të gjuhës angleze dhe se për të siguruar këto dëshmi duhet më shumë se një (1) muaj kohë.

Këshilli i Pavarur Mbikëqyrës për Shërbimin Civil të Kosovës bazuar në dispozitat e Ligjit Nr. 06/L-048 për Këshillin e Pavarur Mbikëqyrës për Shërbimin Civil të Kosovës dhe Rregullores Nr. 02/2018 për Procedurën e Shqyrtimit dhe Vendosijes së Ankesave në Këshillin e Pavarur Mbikëqyrës për Shërbimin Civil të Kosovës, më datë 20.06.2023 ka dërguar kërkesë për përgjigje në ankesë në Departamentin për Menaxhimin e Zyrtarëve Publik të Ministrisë së Punëve të Brendshme. Ndërsa Këshilli më datë 23.06.2023 ka pranuar përgjigje në ankesë me të gjitha shkresat e lëndës.

Kolegji për Shqyrtimin dhe Vendosijen e Ankesave ka Administruar këto Prova: Ankesën me numër protokollit 4847/2023 e datës 20.06.2023 e parashtruar nga ankuesi në Këshillin e Pavarur Mbikëqyrës për Shërbimin Civil të Kosovës; Vendimin me numër Nr.8/2023 i datës 14.06.2023; Vendimin me numër nr.33/2023 i datës 05.06.2023; E-mail i datës 04.09.2020 lidhur me njoftimin për testin e gjuhës angleze; E-mail i datës 16.08.2022; Kërkesë për përgjigje në ankesë e datës 20.06.2023; Përgjigje në ankesë e datës 26.06.2023; Konkurs me numër reference RN00011404 i datës 27.04.2023; Vendimin me numër Nr.05/142 i datës 10.05.2023; Listat e aplikantëve; Njoftimin e datës 05.06.2023; Njoftimin e datës 14.06.2023; Shkresë e datës 07.06.2023; Aplikacioni i datës 06.05.2023; Diplomë me numër Nr.1735 e datës 03.01.2023; Certifikatë mbi dënimet penale me numër Nr.ser.49CDC481253d480 e datës 06.05.2023; Vërtetim nga QPS me numër Nr.748 i datës 02.05.2023; Certifikatë; Certifikatë; Certifikatë; Certifikatë shëndetësore e datës 04.05.2023; Certifikatë; Certifikatë e datës 28.05.2023; Pasqyrë e trustit pensional për periudhën kohore 03.05.2022-03.05.2023; Certifikatë e datës 20.05.2023; Referencë e datës 16.02.2011; Shkresë e datës 21.05.2015; Licencë e datës 14.07.2014; Diplomë e datës 16.12.2002; Shkresë e vitit 2021; Letër reference me numër Nr.43.15 e datës 25.05.2015; Letërnjoftim i T.A.

Kolegji për Shqyrtimin dhe Vendosijen e Ankesave, duke shqyrtuar të gjitha provat e lëndës, konstaton se ankesa e ankuesit është e pabazuar, sepse:

Pasi i ka shqyrtuar pretendimet ankimore të ankuesit si dhe të gjitha provat e lëndës, Kolegji për shqyrtimin dhe vendosjen e ankesave, ka konstatuar se kriteret e konkursit me numër të referencës RN00011404 për emrin e grupit Specialistë i Përgjithshëm i Shkencave Politike kanë qenë:

- *Diplomë e arsimit të lartë më së paku tre (3) vite të studimeve në Shkenca Politike, Administratë Publike, Politika Sociale, Juridik;*
- *Njohja e gjuhës ANGLEZE në nivelin C1-C2 (e obliguar). Njohja e gjuhës angleze dëshmohet përmes certifikimit nga një institucion i akredituar vendor ose ndërkombëtar ose studime universitare të kryera në këtë gjuhë; si dhe*
- *Përvoja e punës e kërkuar: Së paku një (1) vit përvojë pune në fushën për të cilën zhvillohet procedura për plotësimin e pozitës së lirë të punës.*

Lidhur me pretendimin ankimor të ankuesit, Kolegji pas analizimit të dosjes së aplikimit të ankuesit dhe ka gjetur se ankuesi me rastin e aplikimit për pozitën "Zyrtar i Misionit Diplomatik" në Ministrinë e Punëve të Jashtme dhe Diasporës në Zyrën e Sekretarit të Përgjithshëm si dëshmi të kualifikimeve të tij dhe përvojës së punës posedon: Diplomë Universitare me numër Nr.1735 të lëshuar me datën 03.01.2013, me të cilën dëshmohet se ka kryer Fakultetin Juridik me datën 08.06.2011 morri titullin "Jurist i Diplomuar" ndërsa si dëshmi të përvojës së punës ka paraqitur pasqyrën e Trustit Pensional për periudhën kohore 03.05.2022 deri më 05.05.2023 me të cilin ka dëshmuar se ka përvojë pune një (1) vit, ndërsa për sa i përket njohjes së Gjuhës Angleze i njëjti nuk ka ofruar asnjë dëshmi apo certifikatë nga institucionet vendore apo ndërkombëtare ashtu siç përcaktohet në kriteret e konkursit me numër të referencës Nr.RN00011404 të datës 27.04.2023 "Njohja e gjuhës ANGLEZE në nivelin C1-C2 (e obliguar). Njohja e gjuhës angleze dëshmohet përmes certifikimit nga një institucion i akredituar vendor ose ndërkombëtar ose studime universitare të kryera në këtë gjuhë".

Kolegji për Shqyrtimin dhe Vendosjen e Ankesave i 'u referua dispozitave ligjore në fuqi përkitazi me procedurën e pranimit të nëpunësve civil, gjegjësisht:Ligjit Nr.06/L-114 për Zyrtaret Publikë, ku me nenin 34 përcaktohet: 1. "Përveçse kur parashikohet shprehimisht ndryshe në këtë ligj, pranimi në Shërbimin Civil bëhet në kategorinë profesionale në grupin e administrimit të përgjithshëm dhe në secilin nga grupet e administrimit të veçantë". 2. "Pranimi në kategorinë profesionale bëhet nëpërmjet një konkurrimit të hapur dhe publik. Konkurrimi organizohet në mënyrë periodike dhe sipas nevojave dhe së paku një herë në vit, për grupin e administrimit të përgjithshëm dhe për secilin nga grupet e administrimit të veçantë". 3. "Konkurrimi organizohet nga DMZP për institucionet e administratës shtetërore dhe nga Njësia e Burimeve Njerëzore për çdo institucion tjetër (në tekstin në vijim: njësia përgjegjëse)". 4. "Njoftimi për hapjen e procedurës të konkurrimit shpallet në një afat jo më të shkurtër se 21 ditë, nga data e përcaktuar për paraqitjen e aplikimit, nga njësia përgjegjëse, në ueb faqen unike të procedurave të konkurrimit të SIMBNJ dhe me një të tjera të përshtatshme. Afati për pranimin e aplikacioneve nuk mund të jetë më i shkurtër se 8 dite dhe jo më i gjatë se 15 ditë kalendarike". 5. Shpallja e konkursit, sipas paragrafit 4 të këtij neni, përfshin përshtatshme të punës për grupin përkatës, pozitën e punës të lira në grupin përkatës, kriteret që duhet t'i plotësojnë kandidatët, afatin për aplikim, të dhënat e hollësishme për zhvillimin e procesit të përzgjedhjes dhe dokumentacionin që duhet paraqitur për aplikim". 6. Konkurrimi zhvillohet në dy faza: 6.1. verifikimi paraprak, nëse kandidatët i plotësojnë kriteret e përgjithshme dhe ato të veçanta, sipas shpalljes së konkursit; 6.2. vlerësimi i njohurive dhe cilësive profesionale të kandidatëve. 7. "Verifikimi paraprak kryhet nga Njësia e përgjegjëse, ndërsa vlerësimi i kandidatëve bëhet nga

Komisioni i pranimit (në vijim: Komisioni i pranimit), i krijuar për secilin grup të administrimit të përgjithshëm apo administrimit të veçantë për të cilin zhvillohet konkurrimi...."

Ndërsa me Rregulloren (QRK) Nr.16/2020 për Pranimin dhe Karrierën në Shërbimin Civil të Republikës së Kosovës, ku neni 9 parasheh se : 1."Shpallja e një procedure konkurrimit publikohet nga Njësia Përgjegjëse në ueb faqen unike të procedurave të konkurrimit dhe emërimit, pjesë e Sistemit Informativ për Menaxhimin e Burimeve Njerëzore (në tekstin e mëtejme: "SIMBNJ)". 2. "Përveçse përcaktohet në paragrafin 1 të këtij neni, shpallja e konkurrimit publikohet, sipas rastit edhe në: 2.1. ueb faqen e ministrisë përgjegjëse për administratën publike, për konkurrimet për pranimin në shërbimin civil në Institucionet e Administratës Shtetërore, si dhe në ueb faqet e secilit institucion të administratës shtetërore si vjegëz e veçantë e ndërlidhur me SIMBNJ apo në; 2.2. ueb faqen e Institucionit Tjetër Shtetëror për konkurrimet për pranimin në këto institucione". 3."Njoftimi për hapjen e procedurës të konkurrimit, shpallet në një afat jo më të shkurtër se njëzetë e një ditë (21) ditë kalendarike, nga data e përcaktuar për paraqitjen e aplikimit, nga njësia përgjegjëse. Afati për pranimin e aplikacioneve, nuk mund të jetë më i shkurtër se tetë (8) ditë dhe jo më i gjatë se pesëmbëdhjetë (15) ditë kalendarike". Ndërsa me nenin 10 përcakton se: 1."Shpallja e konkurrimit për një Grup të caktuar përmban, të paktën, këto të dhëna: 1.1. përshkrimin e përgjithshëm të punës së Grupit për të cilin zhvillohet konkurrimi; 1.2. Kërkesat e përgjithshme për pranim sipas nenit 8 të LZP; 1.3. kërkesat e përgjithshme formale; 1.4. njohuritë, aftësitë dhe cilësitë që vlerësohen në procedurën e konkurrimit (kërkesat e përgjithshme të nevojshme); 1.5. listën e pozitave, aktualisht të lira, të Grupit për të cilin zhvillohet konkurrimi; 1.6. mënyrën për paraqitjen e aplikacioneve; 1.7. afatin përfundimtar për pranimin e aplikacioneve të përcaktuar me datë të saktë kalendarike; 1.8. dokumentet që duhet të dorëzohen si pjesë e aplikacionit dhe mënyrën e dorëzimit të tyre; 1.9. mënyrën e vlerësimit të kandidatëve/aplikantëve; 1.10. mënyrën e njoftimit dhe komunikimit me kandidatët...", neni 12 përcakton se: Përmbajtja e aplikacioneve 1. Aplikacioni përmban këto të dhëna: 1.1. një referencë në shpalljen e konkurrimit; 1.2. të dhënat personale të kandidatit; 1.3. nivelin e arsimit si dhe diplomat e fituara, institucionet arsimore, datat e diplomimit; 1.4. një përshkrim të hollësishëm të përvojës së punës, duke përfshirë: emrin e punëdhënësit, funksionet, titujt, rangjet, kohëzgjatja e punës, një përshkrim i shkurtër i detyrave, numri dhe lloji i personelit nën mbikëqyrje, adresa e punëdhënësit, arsyet për largimin nga vendi i punës; 1.5. njohuritë gjuhësore; 1.6. informata mbi trajnimet e veçanta të kryera, kualifikimet profesionale dhe specializimet, aftësitë e veçanta dhe publikimet; 1.7. njohuritë kompjuterike; 1.8. emri, adresa dhe numri i kontaktit të dy (2) personave referues; 2. Së bashku me aplikacionin për pjesëmarrje në procedurën e konkurrimit, kandidatët duhet të bashkëngjitin edhe dokumentacionin si në vijim: 2.1. kopjet e diplomave të dhëna nga institucionet arsimore; 2.2. kopjet e dëshmisë së punësimit, dhe 2.3. kopjet e dokumenteve që provojnë plotësimin e kushteve për aplikim të përcaktuara në shpalljen e konkurrimit dhe të deklaruara në aplikacion. Neni 14 përcakton se: 1."Konkurimi për pranimin në shërbimin civil, përfshin dy faza: 1.1. Verifikimi paraprak i kandidatëve; dhe 1.2" Vlerësimi i Kandidateve". Neni 15 përcakton se: 1."Verifikimi paraprak është procesi i verifikimit nëse kandidati plotëson kushtet për aplikim". 2."Verifikimi paraprak kryhet nga Njësia Përgjegjëse, në bazë të dokumenteve të paraqitura si pjesë e aplikimit dhe verifikimeve të tjera sipas detyrës zyrtare që ndërlidhen me verifikimin paraprak". 3."Në përfundim të verifikimit paraprak, Njësia Përgjegjëse përcakton kandidatët që plotësojnë kushtet për aplikim. Vetëm kandidatët që plotësojnë kushtet për aplikim kanë të drejtë të vazhdojnë më tej konkurrimin në fazën e mëtejshme, e cila njihet si lista e ngushtë". 4."Kandidatët të cilët plotësojnë kushtet për aplikim renditen në një listë sipas rendit alfabetik. Lista shpallet në pajtim me nenin 9 të kësaj Rregulloreje por jo më vonë se pesëmbëdhjetë (15) ditë nga data përfundimtare e pranimit të aplikacioneve". 5."Kandidatë, që nuk plotësojnë kushtet për aplikim në pajtim me paragrafin 1 të këtij neni, nuk kanë të drejtë të vazhdojnë më tej konkurrimin. Vendimi për mosplotësimin e kushteve për aplikim, arsyetohet dhe u njoftohet



individualisht aplikantëve, jo më vonë se katërbëdhjetë (14) ditë kalendarike nga data përfundimtare e pranimit të aplikacioneve". 6. "Brenda tre (3) ditëve nga data e njoftimit individual, në përputhje me paragrafin 5 të këtij neni, kandidatët e njoftuar që nuk plotësojnë kushtet e aplikimit, kanë të drejtë të paraqesin ankesë të brendshme. Ankesa parashtrohet më shkrim pranë Njesisë Përgjegjëse. Ankesa shqyrtohet nga Njësia Përgjegjëse e cila me vendim e njofton kandidatin brenda pesë (5) ditëve nga paraqitja e saj".

Nisur nga konstatimi si me lartë, Kolegji i Këshillit konstaton se Departamenti për Menaxhimin e Zyrtarëve Publikë, me rastin e nxjerrjes së Vendimit me Nr.33/2023 të datës 05.06.2023 si dhe Vendimit me Nr.8/2023 të datës 14.06.2023, ka vërtetuar drejtë gjendjen faktike dhe në këtë mënyrë ka zbatuar drejtë ligjin material duke vepruar në pajtim me nenin 34 paragrafin 6 dhe 7 të Ligjit Nr.06/L-114 për Zyrtarët Publikë, si dhe nenin 15 paragrafin 5 dhe 6 të Rregullores (QRK) Nr.16/2020 për Pranimin dhe Karrierën në Shërbimin Civil të Republikës së Kosovës.

Bazuar në nenin 18 paragrafin 1 nën paragrafin 1.1 të Ligjit Nr.06/L-048 për Këshillin e Pavarur Mbikëqyrës për Shërbimin Civil të Kosovës, Kolegji vendosi si në dispozitiv të këtij vendimi.

Vendimi hyn në fuqi ditën e nënshkrimit nga Kryetarja e Kolegjit.

Këshillë juridike: Kundër Vendimit të Këshillit, pala e pakënaqur e cila pretendon se vendimi i Këshillit nuk është i ligjshëm mund të iniciojë konflikt administrativ në Gjykatën Themelore në Prishtinë-Departamenti për Çështje Administrative, brenda afatit prej tridhjetë (30) ditësh, nga dita në të cilën i është dorëzuar vendimi. Inicimi i konfliktit administrativ nuk e ndalon ekzekutimin e këtij vendimi.

KËSHILLI I PAVARUR MBIKËQYRËS PËR SHËRBIMIN CIVIL TË KOSOVËS
Lënda me numër A.nr.870/2023

Kaltrina Aydullahi-Prenaj

Zyrtare e Lartë për Bashkëpunim Profesional

Malsore Gashi-BAJRAKTARI

Kryetare e Kolegjit



Vendimi i dorëzohet:

- Ankuesit
- Departamentit për Menaxhimin e Zyrtarëve Publikë/Ministria e Punëve të Brendshme;
- Arkivit të KPMShCK- së.